

# Najduže pomračenje Mjeseca u ovom stoljeću

Ljudi širom svijeta od večeras pa do subote navečer moći će vidjeti najduže pomračenje Mjeseca u ovom stoljeću, javlja Anadolu Agency (AA).



Ovaj veliki nebeski spektakl, zatamljeni Mjesec koji se može posmatrati golim okom, već je nastupio u pojedinim dijelovima svijeta.

Riječ je o fenomenu poznatom kao Krvavi Mjesec, koji se događa kada se Zemlja nađe između Mjeseca i Sunca. Tada Mjesec dobije sjajnu crvenu ili smeđkastu boju.

Puno pomračenje će trajati sat i 43 minute i bit će najduže u ovom stoljeću.

Ovaj nesvakidašnji fenomen najbolje će se vidjeti s istočnog dijela Afrike, Bliskog istoka, širom Indije i najzapadnijeg dijela Kine.

Stanovništvo ostatka Afrike, Europe, dijelova Azije i Australije, kao i istočni vrh Južne Amerike, moći će "Krvavi Mjesec" vidjeti samo onoliko koliko dozvole oblaci.

Sjeverna Amerika i Grenland će biti jedina mjesta koja neće moći uživati u ovom fenomenu.

Iz američke Agencije za istraživanje svemira (NASA) su kazali da će ovo pomračenje Mjeseca trajati 27 minuta duže nego pomračenje "Superplavog, Krvavog Mjeseca" kojem je svijet svjedočio u januaru.